

VILKÅR FOR HAMNETENESTER I HERØY KOMMUNE

Vedteke av Herøy kommunestyre i K-sak 192/19 den 12.12.2019

1. VERKEOMRÅDE

1. Disse alminnelege vilkåra er bindande for alle hamnetenester som Herøy kommune utfører. Vilråra er også bindande for hamneoperatørar ved Mjølstadneset Hamneanlegg.
2. For å fråvike vilråra må det inngåast eigen særskilt avtale mellom Herøy kommune og hamneoperatøren om dette.

2. NÆRMARE OM HAMNEVERKSEMDA I HERØY KOMMUNE

1. Hamneverksemda er underlagt Anlegg- og driftsavdelinga i kommunen.
2. Herøy kommune driv hamneverksemd, tenesteyting, utøving av mynde og anna offentleg forvaltning.
3. Hamneverksemda er regulert ved Lov av 21. Juni 2019 nr. 70 om havner og farvann med tilhøyrande forskrifter, forutan internasjonale føresegn om handtering av avfall og sikring (ISPS).
4. Forskrift om bruk og orden i hamner i Herøy kommune.

3. PRIS- OG TILBODSBESTEMMELSAR

1. Hamneoperatørar og andre brukarar av kommunen sine hamneanlegg skal betale gebyr og avgifter i samsvar med gjeldande prislste. Alle prisar er eksklusiv meirverdiavgift og eventuelle andre avgifter.

4. BETALINGSVILKÅR

1. Med mindre anna er avtalt er alle prisar i norske kroner.
2. Om ikkje anna er avtalt skal betaling skje innan tretti (30) dagar frå fakturadato.
3. Herøy kommune kan krevje fakturagebyr. Fakturagebyret skal i så fall spesifiserast på fakturaen.
4. Kunden pliktar å opplyse om rett fakturaadresse og organisasjonsnummer, samt informere Herøy kommune ved eventuelle endring av fakturaadresse.
5. Omfakturering som følgje av at kunden har misleghalde informasjonsplikta, gjev ikkje fritak frå betaling til rett tid i samsvar med opphaveleg faktura.
6. Dersom kunden ikkje betaler fakturaen til rett tid, har Herøy kommune rett til å krevje renter og purregebyr etter føresegna i inkassolova.

7. For at feil i ein faktura eller anna betalingskrav frå kommunen skal kunne gjerast gjeldande mot kommunen, må det reklamerast utan ugrunna opphald.

5. STILLING AV SIKKERHEIT

1. Uansett føresegn i punkt 4, kan Herøy kommune, når kommunen finn grunn til dette, krevje betaling på forskott, bankgaranti eller anna relevant sikkerheit.
2. Inntil det er stilt sikkerheit eller betaling har funne stad, har kommunen rett til, utan forvarsel, å innstille påbyrja hamnetenester eller nekte seglingsløyve.

6. FARVASSAVGIFT

1. Alle føresegn om anløp, bruk av farlei, farvassavgift med vidare kjem fram i gjeldande forskrift om farvassavgift.

7. OPPLYSNINGAR OM ANKOMSTMELDING OG FARTØYOPPGÅVE

1. Ankomstmelding skal sendast hamneoperatøren, med kopi til Herøy kommune, innan 24 timar før tidspunkt for anløp til kai.
2. Reiar eller agenten skal levere fartøysoppgåve til hamneoperatøren, med kopi til Herøy kommune, før ankomst.

8. KAIVEDERLAG

1. Alle skip som nyttar Herøy kommune sine kaier betaler kaivederlag i samsvar med gjeldande prisliste.
2. Eigar, reiar og agent er solidarisk ansvarleg for betaling av kaivederlag.
3. Kaivederlaget vert berekna etter skipet sin storleik og tal på døgn det ligg ved kai.

9. OPPLYSNINGAR OM SKIPLAST

1. Hamneoperatøren skal ubedd, og i tide, gi Herøy kommune dei opplysningar som er nødvendige for at kommunen skal kunne utføre hamnetenester. Hamneoperatøren skal i samsvar med dette gje opplysningar om:
 - a. Særlege forholdsreglar som er nødvendige i samband med utføring av hamnetenester.
 - b. Andre relevante tilhøve for å verne personar, miljø, kommunen eller tredjemanns eigedom mot eventuelle skadeverknader relatert til last/ gods.
2. Dersom hamneoperatøren ikkje oppfyller informasjonsplikta, har kommunen rett til, for hamneoperatøren sin rekning og risiko, å ta dei forholdsreglar ein ser som nødvendige for å avverje skade på personar, ting, eigedom eller miljø.
3. Dersom hamnetenesta omfattar farleg gods, er hamneoperatøren ansvarleg overfor kommunen for at kommunen i god tid får overlevert alle relevante opplysningar i samsvar med gjeldande konvensjonar, lover, reglar og

forskrifter som til ei kvar tid gjeld farleg gods. Dette inneber at hamneoperatøren står ansvarleg overfor kommunen for at alt farleg gods er pakka, merka, emballert og klassifisert i samsvar med gjeldande konvensjonar og reglar, og at det frå myndigheit ligg føre dei løyve som er nødvendige.

10. HANDTERING AV SKIPLAST

1. Hamneoperatøren har sjølv plikt til å utføre kontrollfunksjonar i samband med lasting og lossing og ved inn- og utlevering frå lager.
2. Det er hamneoperatøren sitt ansvar å sikre at godset er pakka og merka i samsvar med gjeldande reglar og praksis slik at det kan motstå normal handtering vind og vêrtilhøve.
3. Herøy kommune er ikkje ansvarleg for å forsikre gods, korkje for sin eigen eller hamneoperatøren sin rekning. Hamneoperatøren er forplikta til å teikne forsikring for skader som gods kan påføre personar eller ting.
4. Varer og gods som vert plasserte på kaier skal snarast muleg fraktast bort med mindre Herøy kommune gjev løyve til at dei vert liggande.
5. Hamneoperatøren er ansvarleg for at emballasje, avfall, restar av last og liknande, er fjerna frå kaiområdet straks etter at skipet har forlate hamna.

11. VAREVEDERLAG FOR GODS- OG VARETRAFIKK

1. For alle varer som vert frakta med skip over Herøy kommune sine kaier vert det betalt varevederlag i samsvar med gjeldande prisliste. Dette gjeld med følgjande unntak:
 - a. Proviant, bunkers, olje og andre forsyningar til fartøy i hamn.
 - b. Pallar og liknande som ikkje er handelsvare.
2. Varevederlag for inngåande varer ligg på varemottakar. For utgåande varer ligg vederlaget på vareavsender.
3. Varevederlaget dekkjer lagring på kaiområdet inntil 48 timar for lasting/lossing. Etter dette tilkjem tillegg i samsvar med gjeldande prisliste.
4. Grunnlaget for utrekning av varevederlaget er vara si vekt i tonn. Kubikklastar vert rekna om til vekteining der 1m³ ikkje er mindre enn 0,5 tonn prisberekna. Enkelte godstypar betaler varevederlag per eining, jamfør gjeldande prisliste.
5. For varer som kjem til hamna i transitt og som vert sendt vidare med fartøy, betaler ein vederlag berre ved inngåande. For varer i transitt til utlandet vert varevederlaget betalt ved utgåande.
6. Melding til Herøy kommune om lasting og lossing av varer skal sendast hamneoperatøren, med kopi til hamnekontoret, før skipet sin ankomst.
7. Herøy kommune kan foreta kontroll av oppgåver ved stikkprøver og forlange å få overlevert manifest og/ eller andre relevante dokumenter.

12. ANSVARSTILHØVE / SIKKERHEIT

1. Hamneoperatøren skal på oppmoding framvise bevis på vekt av godset.
2. Hamneoperatøren er sjølv ansvarleg for handsaminga av godset.

13. REKLAMASON

1. Dersom hamneoperatøren vil halde Herøy kommune erstatningsansvarleg for skader, forseinking eller anna knytt til utføring av hamnetenester, skal dette fremjast for kommunen skriftleg utan ugrunna opphald. Motsegn og krav kan ikkje gjerast gjeldande seinare enn tre (3) månader etter den dagen hamneoperatøren fekk, eller burde ha skaffa seg kjennskap til tilhøvet som kravet er grunna på.

14. TVISTAR, LOVVALG OG VERNETING

1. Partane sine rettar og plikter i samsvar med gjeldande vilkår vert i si heilheit regulert av norsk rett.
2. Tingretten er verneting for alle rettstvistar knytt til bruk av Herøy kommune sine hamneanlegg og forståing av gjeldande vilkår.